

Script of Morning Gojri News Bulletin 12 November 2024 at 1015Hrs

مارننگ گو جری نیوز بلیٹن مورخہ 12 نومبر 2024

یوہ آکاشوانی جموں ہے محبوب سلطانی تیں خبر سنو۔

JK Tribal Affairs

قبائلی امور بارے وزیر جاوید احمد رانا نے تمام اعلیٰ افسران نانہ ہدایت جاری کی ہے جسے یوٹی مانہ قبائلی برادری غی بہبود واسطے چل رہا تمام ترقیاتی پروجیکٹس غور روز مرہ غی بنیاد ور جائزہ لیو جائے تانجے انہاں نانہ تولاں توں تولاں پورو کیو جا سکے۔ مہارا آکاشوانی جموں غا نامہ نگار نے خبر ٹوری ہے جسے جناب جاوید رانا نے پچھلے تہاڑے قبائلی امور محکمہ غی طرفوں چایا گیا اقدامات غور جائزہ لیو۔ اس دوران صوبائی انتظامیہ جموں نے نگرہ مانہ قبائلی بھون تے جموں صوبہ مانہ اکلویہ ماڈل رہا ٹی اسکول غا کم کاج نانہ ویلے سر مکمل کرن مانہ پیش آرہی دقتاں نانہ وی دور کیو۔ وزیر موصوف نے کہیو جسے سرکار قبائلی برادری نانہ سماجی، اقتصادی طور ور با اختیار بنان غا مقصد سنگ بکھ بکھ سکیمان تے پالیسیاں غا موثر نفاذ نانہ یقینی بنا رہی ہے۔ اس تیں علا وہ انہاں نے قبائلی امور بارے سیکریٹری نانہ قبائلی برادری غی ترقی واسطے بکھ بکھ سکیمان بارے بیداری عام کرن واسطے حکمت عملی تیار کرن بارے وی کہیو۔

Tourism

سیاحت نانہ جموں کشمیر غی معیشت غی ریڈ غی بڈی قرار دیتاں واں وزیر اعلیٰ عمر عبداللہ نے پائیدار سیاحتی پالیسی اپنان ور زور دتو ہے تانجے متاتوں متا سیلانی راغب ہون غے نال نال نوجوانان واسطے روزگار غا موقعہ پیدا ہو سکیں۔ مہارا آکاشوانی جموں غا نامہ نگار نے خبر ٹوری ہے جسے وزیر اعلیٰ نے پچھلے تہاڑے سول سیکریٹریٹ جموں مانہ اک اعلیٰ سطحی میٹنگ منعقد کر غے سیاحت محکمہ غا کم کاج غور جائزہ لیو۔ انہاں نے کہیو جسے سیاحت نانہ اک طویل مدتی کوشش غے طور ور دیکھنو چاہیے۔ اس دوران سیاحت بارے کمشنر سیکریٹری نے محکمہ غی کامیابی مستقبل غا پلان تے دیگر بارے اک جائزہ پیش کیو۔ اس تیں علا وہ انہاں نے حالیہ کامیاب تقریب جن مانہ کشمیر مانہ کشمیر میراتھن، جی 20 اجلاس، ایف 4 کار شو، جد کہ جموں مانہ سن برن موسیقی تہوار شامل ہیں نانہ اُجاگر کیو۔ اس میٹنگ غے دوران ریور رافٹینگ تے سکینگ نانہ فروغ دین خاطر اضافی منصوباں بارے وی گل بات کی گئی۔

Rather

جموں کشمیر قانون ساز اسمبلی غا سپیکر عبدالرحیم راتھر نے پچھلے تہاڑے کہیو ہے جسے جموں کشمیر غا خصوصی درجہ غی بحالی واسطے منظور کی گئی قرار داد نانہ متعلقہ حکام در بھیج دتو گیو ہے۔ واضع رہے جسے جموں کشمیر قانون ساز اسمبلی نے حالیہ اک قرار داد نانہ منظوری دتی تھی جس مانہ خصوصی درجہ غی بحالی تے آئینی گرانٹی بارے گل کرن غور ذکر کیو گیو تھو۔ اس قرار داد غی حمایت بی جسے پی نانہ چھوڑے تمام سیاسی جماعتاں نے کی تھی۔ جناب راتھر نے پچھلے تہاڑے سرینگر مانہ ذرائع ابلاغ غا نمائندہ سنگ گل کرتاں واں کہیو جسے ہم نے اس قرار داد نانہ منظور کرن آلیے تہاڑے ہی متعلقہ حکام در روانہ کر دتو تھو۔

NIA Searches

قومی تحقیقاتی ایجنسی این آئی اے نے پچھلے تہارے مُلک غی 6 ریا ستاں تے مرکزی زیر انتظام علاقہ غی 9 بکھ بکھ جگہاں ور تلاشی کا روائی کی جس غو مقصد القاعدہ دہشت گرد گروپ غی طرفوں نوجواناں نانہہ دہشت گرد کا روائی غے ذریعے بھارت نانہہ غیر مستحکم کرن غی سازش با ر سُو لینو تھو۔ این آئی اے غے مطابق اس کا روائی غو تعلق اُن افراد سنگ تھو جہیڑا دہشت گرد تنظیم القاعدہ غی سرگرمی مانہہ مدد فراہم کر رہیا تھا۔ اس سلسلہ مانہہ جموں مانہہ نگر وٹہ غے نزدیک بجالتہ گراں مانہہ کا روائی کی گئی۔ اس دوران کُجھ کاغذات اور دوجی ضروری چیزاں نانہہ باز یاب کیو گیو۔ جموں تیں علا وہ یاہ کا روائی کرناٹک، مغربی بنگال، بہار، تری پورہ تے آسام مانہہ وی کی گئی۔

Chief Secretary

چیف سیکریٹری اتل ڈلو نے پچھلے تہارے امروت 2.0 غی 5 ویں یوٹی سطح غی سٹرینگ کمیٹی غی میٹنگ غی صدارت کی۔ جس مانہہ چل رہیا پروجیکٹاں نانہہ منظوری دین با رے وی غور کیو گیو۔ اس میٹنگ غے دوران چیف سیکریٹری نے افسراں ور زور پاتاں واں کہیو جے منظور کیا گیا پروجیکٹاں نانہہ شروع کیو جائے تانجے ویلے سیر انہاں نانہہ پورو کیو جا سکے۔ انہاں نے مزید کہیو جے اس راہ غی مرکزی سکیم قومی اہمیت غی حامل ہیں تے انہاں ور خصوصی توجہ پاغے زمینی سطح ور نفاذ نانہہ یقینی بنانو چاہیے۔ جموں، بہدرواہ، آر ایس پورہ، اکھنور، چنینی، بیرا نگر، کٹھوعہ، لکھن پور، وجے پور، ریاسی جموں صوبہ غا بڑا شہراں مانہہ ہیں۔ جن غی شناخت اُمُرت 2.0 غے تحت پانی سپلائی سکیم ڈبلیو ایس ایس واسطے کی گئی ہے۔

JK Snowfall

جموں تے اس غا کول کال غا علاقہاں مانہہ دیر رات با رش تے ناس غی وجہ سنگ درجہ حرارت مانہہ کمی درج ہوئی ہے۔ اس غے نال نال حالیہ تہاڑاں مانہہ خراب ہوا ہوا غا معیا ر مانہہ بہتری آئی ہے جدکہ جموں کشمیر غا اُچیرا علاقہاں مانہہ ہلکا تے درمیانہ درجہ غی برفباری وی ہوئی ہے۔ مغل شاہراہ جہیڑی جنوبی کشمیر تے راجو ری پونچھ ضلعان نانہہ جوڑے تے بانڈی پورہ گریز سڑک نانہہ گڈیاں غی آمدورفت واسطے عارضی طر ور بند کیو گیو ہے۔

اس غے نال ہی خیراں غو یوہ بلیٹن ختم ہوؤ۔